

Liafuan Badak Husi Ministru Planu no Finansas
Iha Okaziaun Serimónia Hasa'e Bandeira
Iha Ministériu Planu no Finansas
Segunda-feira, loron 2 fulan Outubru tinan 2017

Loron di'ak ba ita!

Sras/Srs Diretor-jerál, Nasional, Xefi Departamentu no funzionáriu tomak Ministériu Planu no Finansas ne'ebé ha'u respeita.

Ha'u hein katak imi hotu isin di'ak.

Iha biban ida ne'e, ha'u hakarak fanu ita hotu nia neon no halo apelu ida atu ita hotu tau ita nian fokus ba objetivu ne'ebé boot liu ita nian interese rasik. Objetivu mak ne'e: *Construir um País Financeiramente Independente*. Ita nia símbulu ne'e nia signifikadu klean tebes. Pur exemplu, pentágono ne'e reprezenta símbulu puder no rohan lima ne'e reprezenta reforma lima ne'ebé lao daudaun hela iha area institusional, rekursu umanu, infraestrutura, política, nst.

Ejemplu konkretu mak reforma fiskál ne'ebé nia prosesu hahú iha VI Governu Konstitusionál liubá. Reforma fiskál abranje re-estruturasau no re-ordenamentu iha area importante rua ne'ebé sai odamatan prinsipál Timor-Leste nian ba kobransa reseita ba kofre Estadu nian liu husi maneira ida transparente, íntegra no responsavel. Area primeiru mak Diresaun-jerál Alfandega ne'ebé hahú 29 setembru nakfila an ba Autoridade Aduaneira, tuir Dekretu-lei nu. 9/2017, ho misaun prinsipál atu ezerse kontrolu fronteira Timor-Leste no teritóriu aduaneiru tomak para fins fiskais, ekonómiku no protesaun saude publiqua no seguransa sosiedade, no administra impostu. Area segundo mak Diresaun-jerál Impostu ne'ebé tuir Dekretu-lei nu. 13/2017 nakfila an ba Autoridade Tributária hahú iha 29 Setembru. Liu husi Autoridade rua ne'e mak ita konsegue aumenta reseita ba kofre Estadu nian.

Belak Osan Mean ne'e reprezenta rikusoin familia sira nian. Iha linguajem téknika ita dehan *disposable income*. *Mortein* ne'e reprezenta rekoñesimentu papel feto sira nian iha prosesu dezenvolvimentu Nasaun no akumulasaun rikusoin.

Timor-Leste laiha instrumentu selae política fiskál. Fundamentalmente, papel Ministériu Planu no Finansas mak oinsa harii ekonómia ida ne'ebé inkluzivu, justu no prósperu, ho oportunidade ba ema hotu.

Durante tinan 15, ha'u akompaña mudansa oioin iha Ministériu ida ne'e no ha'u bele dehan katak iha mudansa ba di'ak. Ha'u mós le relatório ne'ebé ha'u simu husi ex-Ministra Finansas, Dra. Santina Cardoso, iha loron 18 Setembru liubá. Ita bo'ot sira bele orgullu ho progresu lubun ida ne'ebé alkansa tiha ona.

Husu ba funzionáriu tomak Ministériu Planu no Finansas atu hakas an oinsa edifísiu ho facilidades tomak ne'ebé ita iha daudaun ne'e bele sai simbóliku ida ba Timor-Leste tomak.

Iha edifísiu ida ne'e nia laran mak ita serbisu nudar *team* ida no serbisus ne'ebé ita fó ba público no Estadu Timor-Leste nu'udar produtu serbisu iha ekipa. Susesu ne'ebé ita alkansa, ita celebra hamutuk.

Ministériu Planu no Finansas Ministériu tékniku ida.

Progresu sira ne'ebé Ministériu ida ne'e alkansa too ohin loron tanba profesionalismu funzionárius tomak ho lideransa ne'ebé di'ak, hahú kellas husi Dra. Fernanda Borges, mai too iha Primeiru Governu konstitusionál, Dra. Madalena Boavida ho nia Vise-Ministra Dra. Aicha Bassarewan, mai too Governu Aliança Maioria Parlamentar ne'ebé Ministériu ida ne'e lidera husi Dra. Emilia Pires ho nia Vise-Ministra Dra. Santina Cardoso, no iha Kintu no Sestu Governu Konstitusionál, Dra. Santina sa'e ba Ministra ho nia Vise-Ministru Eng. Helder Lopes.

Pela primeira vez, Ministériu Planu no Finansas lidera husi mane ida.

Iha ha'u nia esperiensia rasik, iha Timor-Leste ka serbisu iha NASAUN sira ne'ebé iha ona nível dezenvolvimentu ás, sistema méritu mak xave ba NASAUN sira ne'e nia susesu.

Nu'udar Ministru Planu no Finansas, ha'u la presija hatene ita bo'ot sira nia aman ho inan mak se. Ha'u la presija hatene ita bo'ot sira nia partidu polítku mak ida ne'ebé. Ka ita bo'ot sira nia fiar ka dialetu mak ida ne'ebé.

Importante liu ba ha'u mak ita bo'ot sira nia karater, oinsa ita bo'ot sira nia kontribuisaun ba Ministériu ida ne'e no prontidaun atu servi sosiedade Timor-Leste.

Ha'u fiar katak Ministériu ida ne'e sei kontinua dezempeña nia funsaun téknika ho susesu wainhira ita idaidak komprende lolós fundamentu ba susesu ne'e rasik.

Fundamentu ba susesu Ministériu Planu no Finansas asenta iha buat Lima:

1. Estabilidade polítkica iha rai laran. Bele hanoin la hanesan, maibe Povu Timor-Leste ida deit.
2. Funzionáriu ho formasaun akadémika di'ak no prontu atu servi no simu osan tuir buat ne'ebé sira produs.
3. Abilidade atu utiliza tehnolójia ne'ebé monta ona.
4. Produs serbisu ho padraun ida ne'ebé ás no transparente.
5. Wainhira hala'o servisu buka ses an husi interferensia polítkika ruma no hadok an husi tentasaun.

Hanesan ha'u temi, ita sira mai husi *background* oioin. Balun mai husi uma ka'in sira ne'ebé kbi'it laek, balun husi família sira moris di'ak ona.

Balun konsegue sa'e too iha kareira nia eskalaun ás ona tanba serbisu makas, dedikasaun no *performance/dezempeñu*.

Ha'u hakarak haree número ema sira ne'ebé hetan susesu iha sira nia kareira ne'e aumenta ba beibeik.

Ha'u hakarak haree feto no mane, professional ne'ebé di'ak no ho dedikasaun aumenta durante ha'u nia mandatu nu'udar Ministru.

Iha ita nia tradisaun, uzu no kostume, ita laiha grupu etniku ruma mak domina iha ita nia sosiedade.

Susesu no progresu mai husi méritu liuhusi ita nianabilidade wainhira hala'o serbisu. Méritu ne'e mai husi treinu no formasaun oioin, estuda nafatin no espiritu haraik an hodi aprende ho ema seluk.

Ba funzionáriu sira iha kargu xefia, lalika tauk wainhira haree ita bo'ot sira nia funzionáriu ruma hatuduabilidade no hala'o serbisu di'ak liu ita bo'ot. Orgullu ba tanba ne'e konsekuensia husi investimentu ne'ebé ita rasik halo liu husi treinamentu no formasaun.

Dala ida tan, ha'u hakarak subliña katak, prezensa ita bo'ot sira iha fatin ida ne'e laós tanba ita bo'ot sira nia *status*. Ita bo'ot sira iha ne'e no kaer kna'ar xefia ruma tanba méritu.

Ha'u husu funzionáriu tomak kaer valor ne'e halo ás wainhira hala'o serbisu.

Ajensia no komunidade Internasional sei fó kréditu ba ita wainhira ita hatudu katak ita laós baibain, maibe esepsonál. Nune'e, ita labele sai *biasa-biasa* deit tuir ema seluk nia ain fatin ne'ebé konvensionál, maibe buka sai ida *luar biasa* ne'e, esepsonál, no hatudu provas katak sai esepsonál ne'e mak lós.

Ha'u hatene katak barak mak keixa konaba saláriu ki'ik. Ha'u rasik iha esperiensia oinsa difisil moris ho saláriu ki'ik.

Maibe, ha'u hakarak hatete ba ita bo'ot sira hotu katak funzionáriu sira nia saláriu loron ida mós sei bele tuir nível merkadu (*market rate*), wainhira ita tau hamutuk ita nia kosar wen, energia, tempu atu dudu ekónómia nacionál ba oin.

Dadus husi Kontas Nasionais hatudu katak iha tinan 2002 ita nian PIB per capita laós-minarai \$651; iha tinan 2014, sa'e ba \$1004, hatudu kresimentu 54%.

Ekonomista sira hatene momos katak kresimentu ekónómiku la akontese lalais. Kresimentu PIB mai husi serbisu makás sidadaun sira hotu no ita nian matenek oinsa antesipa saida mak sei mai hasoru ita aban bainrua.

Dezafiu bo'ot ne'ebé Timor-Leste enfrenta iha tinan sanulu mai mak oinsa karater kresimentu ne'e bele sustentável, inkluzivu, justu no ho oportunidade ba sidadaun hotu. Laós deit atu alkansa moris di'ak em termos materiais, maibe mós oinsa atinje padraun kultural ida ne'ebé ás no hametin ita nian identidade.

Kresimentu ida ne'ebé sustentável tenke mai husi ita nian kosar rasik no laós depende deit ba reseitas husi Fundu Minarai. Ha'u hakarak subliña iha ne'e tanba ba oin, enkuantu ita seidauk iha fonte seluk reseita nian, maka ho ritmu gasta osan husi Fundu Minarai sei halo konke osan iha Fundu ne'e sei remata iha tinan 13 mai ne'e. Iha tempu ne'ebá karik ita nia oan sira foin mak atu ba ensinu sekundáriu. Keta haluha, reseitas husi minarai hahú tun ona, hahú kendas iha tinan 2014, no tuir projesaun ne'ebé iha, iha tinan 2018 reseitas hamutuk millaun \$300 deit.

Mensajem ida ne'e importante atu ita hotu tau iha ulun no neon katak lei fundamental ekónomia ida ne'ebé ita haluha beibeik mak eskases ka *kelangkaan*. Katak rekursu sira sei remata iha loron ida. Nune'e, ita iha eskolla rua: ida, ita hamanaasa kontenti ohin no tanis aban bainrua; rua ita rasionaliza rekursu ne'ebé iha hodi hanoin mós jerasaun sira tuir mai, mak ita nia oan no beioan rasik.

Ohin loron, ita iha situasaun ida risku tanba inserteza iha merkadu finanseiru mundu nia lalaok hatudu volatilidade ás no bele lori perigu mai ita nu'udar sosiedade. Espíritu sakrifisiu seidauk halo parte iha ita nia moris lorloron nian; ema balun hetan osan ho lalais no fásil; ema balun hakark hetan osan la liuhusi nia kosar rasik; ema barak lakohi halo serbisu iha agrikultura. Konsekuensia mak ita depende ba importasaun; sosa bee husi rai liur baratu liu duke produs iha rai laran; sosa sabaun ho shampoo husi liur baratu duke produs rasik iha rai laran.

Funsionárius tomak ne'ebé ha'u respeitu.

Ministériu Planu no Finansas tenke sai número um; instalasoes sira ne'ebé di'ak liu Ministériu sira seluk ita iha ona. Tanba ne'e, ita presija hakas an sai esepsonál, liului tanba kna'ar ne'ebé todan iha ita nia kabás.

Tau matan ba jestaun finansas no patrimóniu Estadu nian no oinsa buka estimula kresimentu ekónomiku ida ne'ebé sustentável, inkluzivu, justu no ho oportunidade ba sidadaun hotu. Todan ne'ebé iha ita nian kabás mak oinsa jere osan no patrimoniu Estadu ho eficiente.

Keta haluha, ema bele lakon fier iha ita wainhira ita la tane ás valor no prática sira hanesan governasaun di'ak, mérito, anti-korupsaun no pragmatismu.

Atu remata, ha'u hakarak apela funsionáriu tomak atu uza ita nia hanoin (*common sense*) wainhira ita hala'o ita nia serbisu. Lorloron husu ba ita nia an: Ha'u iha ne'e halo saida lós? Ema hira iha liur ne'ebá mak la hetan oportunidade serbisu iha fatin ida hanesan ne'e?

Fokus ita nia hanoin ba ema liu rihun atus rua ne'ebé laiha ita nia le'et, la konsegue goza moris hanesan ita tanba sira hili fó sira nia an ba Bandeira ne'ebé ita foin hasa'e ne'e. Hanoin tok ida ne'e wainhira hala'o ita nia kna'ar.

Obrigadu wa'in ba imi hotu nia atensaun no bom traballu.

Na'i Maromak haraik Nia tulun mai ita hotu.